

Protocol da la radunanza generala dals 5 december 2024, a las 20.30 illa chasa cumünala Misoch

Preschaints

Christian Poo, Sabina Stricker, Jon Buchli, Andri Poo, Mario Rauch, Plasch Caviezel, Flurin Roner, Peder Poo, Flurin Nuotclà, Andri Linsel, Tina Weiss, Cla Rauch, Annatina Nuotclà, Armon Nuotclà, Gianna Bettina Gritti, Flurina Jann, Nataglia Roner, Corina Caviezel, Gianna Rauch Poo, Chasper Alexander Felix, Aita Dermont, Braida Pinggera, Roland Franziscus, Mischa Weiss.

Tractandas

1. salüd dal president e s-chüsas
2. tscherna scrutinadurs
3. protocol da la radunanza generala 2023
4. rapport annual dal president
5. rapport da la chaschiera e dals revisurs da quint
6. rapports dal schef da cuorsa, schef da turas, delegià Traversada e Stafetta tras Sent
7. mutaziuns ed onurificaziuns
8. tschernas
9. fixar contribuziun annuala
10. program da l'on
11. varia

1. salüd dal president e s-chüsas

A las 20.30 po il president Christian Poo salüdar a 24 commembras e commembers. S-chüsats s'han Cristina Gregori, Lilo Mock, Reto Rauch, Monica Roner, Seraina Riatsch, Mario Riatsch, Marco Laurent, Anna Barbla Buchli, Dumeng Jann, Christoph Weiss, Flurin Weiss, Andri Gritti, Chasper Buchli, Sara Rauch, Marina Buchli, Jan Sedlacek, Christina Sedlacek, Men Caviezel e Gian Caviezel.

Il president salüda als preschaints. L'invid es gnü tramiss tenor statüts, uschè cha la radunanza es abla da trar decisiuns. I nu vegnan fattas ningünas propostas da müdamaints da las tractandas.

2. tscherna scrutinadurs

Sco dombravuschs vain eletta Nataglia Roner.

3. prelecziun dal protocol da la radunanza generala 2023

Il protocol da la radunanza generala 2023 es gnü tramiss insembel cul invid. El vain approvà sainza cuntravuschs.

4. rapport annual dal president

Il president rapporta davart l'on scuors. In november haja dat blera naiv chi ha tgnü lura bain d'urant tuot l'inviern. Las relaziuns da pistas e loipas d'eiran optimalas. Eir las 2 gitas han pudü gnir realisadas.

El rapporta davart ils arrandschamaints dal club: il tir da tschoccas a Sur En (28 participants), las cuorsas dal club quista jada darcheu cun üna cuorsa da passlung sù Ftan, cun ün slalom gigantesc ed ün slalom adüna cun duos parcuors, la gita sù Niruns (8 participants), duos gitas da skis e la Stafetta tras Sent. Pro la stafetta es gnüda organisada eir l'ustaria davart dal club. Implü han commembers dal club eir sustgnü pro'ls arrandschamaints: coppa mundiala

da snowboard, Passlung Martina – Scuol e la cuorsa da ski alpinissem MottUp. La joslada oura Vastur nun ha gnü lö pervi da mancanza da participants. El ha plaschair da la grond'actività da nos club e'l grond nomer da participants. Causa quista situaziun fich allegraivla survain il Club skiunzs Sent darcheu üna contribuziun annuala dal cumün da CHF 1'500.

Eir l'OJ da Nordic Scuol e l'OJ Motta Naluns vegnan sustgnüts da nos club.

Per finir seis pled ingrazcha il president a sia collega e seis collegas dal comité ed a tuot ils commembers per lur sustegn. El ingrazcha eir als sponsurs dals premis. El giavüscha a tuots ün bel inviern cun blera naiv e sainza accidaints.

5. rapport da la chaschiera e dals revisurs da quint

La chaschiera, Sabina Stricker preschainta il rendaquint da l'on scuors. Quist on serra giò il quint cun ün guadogn da CHF 452.48 CHF. Il chapital agen importa uossa CHF 32'635.13.

La revisura Braida Pinggera preschainta eir in nom dal revisur Chasper Buchli lur rapport. Ella prelegia il quint. Il quint vain fat bun cun dar dis-charge als organs respunsabels.

In quist'occasiun vegna darcheu decis cha la suprastanza possa disponer d'ün import da CHF 1000.- chi sta illa cumpetenza da decider dal comité sves.

A la chaschiera pertocca ün ingrazchamaint per tuot sia lavur instancabla. Displaschaivelmaing sorta ella da la suprastanza. La revisura e'l president tilla ingrazchan fich per sia gronda lavur d'ürant ils ultims 4 ons. Il president tilla dà ün regal per sia gronda lavur.

6. rapports dal schef da cuorsa, schef da turas, delegià Traversada e Stafetta tras Sent

Il schef da cuorsa Jon Buchli, rapporta davart la cuorsa dal club, quist on darcheu cun ün passlung da not sü Ftan, cun 2 parcuors da slalom e 2 parcuors da slalom gigantesc. 7 participants han fat part al passlung, 13 curriduras e curridurs han fat part dal slalom e 24 al slalom giganstesc. 8 famiglias sun gnüdas rangadas illa categoria speciala La rangaziun ha gnü lö darcheu sco üsità. El ingrazcha fich a Roland Franziscus e sia agüdonga Tina Weiss chi piglian fingià daspö lösch il temp per nossas concorrenzas. Plünavant ingrazcha el ad Andri Gritti chi fa las glistas e'ls sponsurs pels premis. El intimescha da's participar a nossas cuorsas. Culla rangaziun da famiglia as prouva propcha da muossar chi nun es decisiv il temp, dimpersè la partecipaziun.

Il schef da turas, Andri Poo po comunicar chi s'haja pudü far d'ürant l'inviern darcheu 2 turas: üna sül Mot Tea Nova (10 participants) cun relaziuns da naiv magari difficilas ed üna sül Piz Spadla e giò da Tardanna (12 participants). Partits eschna cun bell'ora, ma rivats lura propcha in üna situaziun chi nu's vezzaiva plü nöglia. Grazcha a l'esperienza dals duos manaders Jon Buchli e Christian Poo sun tuots rivats sans e salv a chasa.

Flurin Nuotclà rapporta davart la Traversada. L'on scuors nun ha gnü lö ingüna Traversada. L'on chi vain varà lö üna Traversada speciala cun quai chi gnarà renovada la Chamonna Sesvenna e cun quai restarà ella tuotta stà serrada. Il comité da la Traversada es landervia a ponderar variantas alternativas. Id es amo massa bod per dar cuntschaint detagls. Flurin manzuna però chi varà lö in mincha cas üna Traversada.

Nataglia Roner preschainta il rapport da la Stafetta tras Sent. Quist on ha la stafetta darcheu gnü lö sco üsità, cun 5 tragets relativamaing cuorts, adattats eir per famiglias cun uffants pitschens. Ella intuna chi haja dat üna squadra be cun scholars ed üna duonna güsta gnüda our d'scoula. Quai demuossa üna jada daplü chi nu va pel rang e temp, dimpersè propcha pella partecipaziun. Ils premis pels giubilar ha ella pudü organisar pro la Butia Schlerin. Ella ingrazcha a quista fich pella collavuraziun e'l sustegn.

7. mutaziuns ed onurificaziuns

Sco novs commembers vegnan bivgnantadas las seguintas personas: Sven Ebben, Flurin Roner e Fadri Schorta.

Sortits dal club sun Gian Claudio Wieser e Gregory Fretz.

Gianna Bettina Gritti, Andri Gritti e Men Werro dvaintan commembers libers causa ch'els sun fingià daspö 40 ons commembers dal Club skiunzs Sent.

Veterans cun 25 ons commembranza dal Club skiunzs Sent nu dvaintan ningüns quist on.

8. tschernas

Tenor statüts ston gnir reelets dūrant ils ons pērs il president, la chaschiera e'l schef da turas. Christian Poo ed Andri Poo as mettan a disposiziun per ün'ulteriura perioda d'uffizi e vegnan reelets cun applaus. La chaschiera ha demischiunà sco fingià manzunà. Il president ha chattà cun Mischa Weiss ad üna persuna chi füss pronta da surtour la successiun. El vain elet cun applaus.

Uschè as cumpuona il comitè in avegnir seguaintamaing:

president:	Christian Poo
actuar:	Mario Rauch
chaschier:	Mischa Weiss
schef da cuorsa:	Jon Buchli
schef da turas:	Andri Poo
revisurs da quint:	Braida Pinggera e Chasper Buchli

Il president surdà a Mario Rauch ün bel regal pella lavur in suprastanza daspö 20 ons.

9. fixar contribuziun annuala

La contribuziun annuala vain fixada sün CHF 25.- per personas sainza commembranza da Swiss-Ski. Ils commembers cun commembranza da Swiss-Ski pajan CHF 50.-.

10. program da l'on

Il program da l'on es gnü protramiss e vain preschantà dal president. El manzuna cha novas ideas sajan adüna bainvissas e dessan gnir dattas inavant ad el. La gita da famiglias da l'on scuors nun ha gnü lö pervi da collisiuns da termins cun turniers da ballapè chi han pudü avair lö pür in avuost. Id es previs da far darcheu dal 2025 ün arrandschamaint da stà per famiglias. La cuorsa MottUp nun ha lö quist on causa il nomer da participants chi'd es i inavo ils ultims ons. Il president spera cha quista cuorsa nu gaja però in invlidanza e possa in avegnir darcheu gnir organisada.

11. varia

Il president ingrazcha al tempader, als revisurs ed a Cla Rauch chi fa la pagina d'internet per lur lavur e dà ün regal da recugnuschentscha. Plünavant survegnan eir ils manaders da l'OJ alpin e nordic ün regalin. I's tratta quia da Silvio Vital e Niculin Caviezel pel OJ nordic e Silvio Andrighetti pel OJ alpin.

5 atletas ed atlets vegnan sustgnüts dal club cun üna contribuziun e cun surtour cuosts da RPN o organisaziun congualablas: Isai Näff, Noè Näff, Marina Benderer, Valeria Benderer e Flurina Rauch.

Christian Poo orientescha cuort davart la radunanza dal RPN chi ha uossa üna nouva suprastanza cun Mario Denoth sco president.

Sabina Stricker ingrazcha a la suprastanza ed als commembers pella collavuraziun da quists ons e giavüscha al nouv chaschier Mischa Weiss tuot il bun.

Andri Poo intimescha a commembers da gnir a güdar pella occurrenzas da la coppa mundiala dad assa als 11 schner 2025 e pel Engiadina Trail chi ha lö la sonda, 28 gүн 2025. Plünavant manzuna'l cha minchün saja fich bainvis da gnir in gita e cha ningүн nun haja d'avair retgnentschas ch'el saja massa plan.

A las 21.35 serra il president la radunanza ed ingrazcha a tuots pella preschentscha.

L'actuar

Mario Rauch